

佛說大乘戒經

西天譯經三藏朝散大夫試鴻臚卿傳法大師臣施護奉詔譯
如是我聞：一時佛在舍衛國祇樹給孤獨園。

爾時世尊告苾芻言：「有破壞戒行壽命者、有斷滅善根者，出家難值，發精進心，堅固守護。」

若諸苾芻等，於佛法中求解脫者，遠離一切諸惡苦惱，如佛所說，寧捨身命而趣無常，不得縱心犯其戒律。

若人捨命只壞一生，若復破戒，令百萬生沈淪惡道。若人持戒當得見佛。

戒為最上莊嚴，戒為最上妙香，戒為歡喜勝因。戒體清淨，如清冷水，能除熱惱。戒法最大，世間呪法，龍蛇之毒而不能侵持戒得名聞，持戒獲安樂，如是命終時，復得生天上。」

佛言：「苾芻！若犯律儀，譬如盲人，不見眾色，亦如無足不能行道，遠離涅槃，不到彼岸。若持戒人成就一切法寶，譬如賢瓶，圓滿堅固，能盛一切珍寶。如是破損，珍寶散失；若破律儀，則捨一切善法。先曾犯戒，而後心欲求涅槃，如去眼、耳，對鏡照面，何所堪能！」

佛言：「苾芻！女人無信，不可親近；王恩雖勝，不可恃怙。水沫無實，不可撮摩；富貴無常，不可久住；色相如花，須臾變異；壽如熟菓，不可久停，如急流渡船、如朽屋暫住；寧食毒藥，不得飲酒；寧入大火，不得嗜慾！」

佛說是經已，時彼苾芻及諸菩薩皆大歡喜，信受奉行。

小注：（以經解經為原則）

一、苾芻：梵語音譯，或以乞士、破煩惱、淨持戒、能怖魔四義釋之。乞士者，以彼自無所營，乞人之信施而清淨活命故也。破煩惱者，以修聖道而破煩惱故也。淨持戒者，以受持盡形淨戒故也能怖魔者，以必入涅槃使魔畏怖故也。又苾芻，天山草名，含五喻義：一體性柔軟，喻出家人，能折伏身語麁獷故；二引蔓旁布，喻出家人，傳法度人連延不絕故；三馨香遠聞，喻出家人，戒德芬馥為眾所聞故；四能療疼痛，喻出家人，能斷煩惱毒害故；五不背日光，喻出家人，常向佛日故。又稱比丘五德。

二、破壞戒行壽命：捨戒、破戒之謂，《四分律》云：「若有捨戒者，於佛法為死；持戒如護命，守之無毀失。」

三、斷滅善根：《地藏十輪經》：「撥無因果，斷滅善根。」《大般涅槃經》云：「一闍提雖斷善根，然佛性不斷，故當來亦可成佛。」

四、若人持戒當得見佛：《大般涅槃經》云：「眾生若不護持禁戒，云何當得見於佛性？一切眾生雖有佛性，要因持戒然後

乃見；因見佛性，得成阿耨多羅三藐三菩提。」
五、戒為最上莊嚴：《毗婆沙》云：「亦名纓絡，老少中年服常好故。」

六、戒為最上妙香：《戒香經》曰：「世間所有諸華香，乃至沈檀龍麝香，如是等香，非遍聞，唯聞戒香遍一切。」

七、戒為歡喜勝因：《大智度論卷十三》：「持戒之人，其心不悔，心不悔故得喜樂，得喜樂故得一心，得一心故得實智，得實智故得厭心，得厭心故得離欲，得離欲故得解脫，得解脫故得涅槃。」

八、戒體清淨，如清冷水，能除熱惱：《摩訶僧祇律》：「戒為清涼池，澡浴諸煩惱。」

九、戒法最大，世間呪法，龍蛇之毒而不能侵：《毗婆沙》云：「如驅龍事，五百羅漢不能逐之，有一羅漢，但以護戒力故，即便驅出，以輕重等持也。」

十、持戒得名聞，持戒獲安樂，如是命終時，復得生天上：《四分律比丘戒本》：「明人能護戒，能得三種樂，名譽及利養死得生天上。」

十一、若犯律儀，譬如盲人，不見眾色：《梵網經菩薩戒本》：「戒如大明燈，能消長夜暗。」又云：「若不持此戒，如所應布薩，喻如日沒時，世界皆暗冥。」

十二、亦如無足，不能行道：《四分律比丘戒本》：「譬如人毀足，不堪有所涉。」

十三、若持戒人成就一切法寶：《佛遺教經》：「若人能持淨戒是則能有善法，若無淨戒諸善功德皆不得生。」

十四、先曾犯戒，而後心欲求涅槃，如去眼、耳，對鏡照面，何所堪能：《毗婆沙》云：「又戒名為頭，能見苦諦諸色，乃至知色陰等法故。」

十五、女人無信，不可親近：《大般涅槃經》云：「若人不知是佛性者，則無男相。所以者何？不能自知有佛性故。若有不能知佛性者，我說是等名為女人。若能自知有佛性者，我說是人為丈夫相。若有女人能知自身定有佛性，當知是等即為男子。」

十六、色相如花，須臾變異：《梵網經菩薩戒本》：「壯色不停，猶如奔馬。」

十七、壽如熟菓，不可久停：《梵網經菩薩戒本》：「人命無常，過於山水；今日雖存，明亦難保。」

十八、如急流渡船，如朽屋暫住：《法華經》三界火宅喻。

十九、寧食毒藥，不得飲酒；寧入大火，不得嗜慾；捨命護戒。如本經云：「捨命只壞一生……破戒……令百萬生沈淪惡道。」